

Blochboum – Hexasprüch 2010

Auf geahrt´s Mander es isch Zeit,
dass es huira wieder a Blochziacha geit.
Und so viel Leit wieder am Platz da stiah,
dia lassa sich dös Fisser Blochziacha it entgiah.
I darf enk alla gonz hearzli willkommen hoassa,
die Prominenz, die Einheimischa, die Gösch, die Kluana und Groaßa.
I wünsch enk alla an unterhaltsama Noumittag,
und losnats guat zua was I Enk nou alls sag.

Miar haba natürlu wieder allerhond zum kloga
Was sich die letschta 4 Jahr zua hat troga,
wer anständi gwöst isch den druckt kua Gwissa
und die Ondara alla kennas ruhi wissa.
I hoff, dass es kuana Verübel geit
Denkats dron es isch Fasnachtszeit.

Dia schiana Wolfwiesa so manchem tuats weah,
da kimmt iatz der groaße Speichersea,
zwoa Jahr Bauzeit, wo leit da der Sinn
dia Braunkelchen kannta huira schua boda da drin,
I hon alli gmuant es hondlat sich um a gonza Voglschaar,
drweil war der gonz Aufwond wega´ma uanziga Paar,
nocha tia dia Vögl ersch nou jeds Jahr ama ondara Oart briata,
und insara Verontwortliche va da Bergbohna und Arbeiter miaßa da drfür bliata,
oft mecht´ma schua wissa was dena Beomta im Hiara umgeahrt,
und ob iatz d´Viecher voar da Leit auf der Lischta steahrt,
obwohl s´Wasser tia ma ja ou braucha für d´Fleach und d`Leis,
aber da Schnea, ös Griana lassat´s ins bittschia nou weiß,
a so zeggiara ma konns it verstiah
dia kriaga bei ins da kua Freikorta miah.

It alles muaß o Jägerlein,
was raschlat hinterm Boum ein Hirschlein sein,
drum ös Grantabrocker verschwindat schnell,
sinsch habat´s gach a Loch im Fell,
Überhaupt keahrt dr Wald dr Jagarei,
dass da sinsch niamand öpas z´suacha hei,
Es hat schua amal göba an mysteriösa Schuß,
dr Nachbar hat gmuant mit seim Löba isch Schluß,
dia Polizei kriagt dös ou mit,
a Ponzergloas dös war a Hit,
paßat´s besser auf Enkra Gwehner au
sinsch steahrt s´nägschte mal lebenslängli drau.

S'letscht Johr war für dia Jagr sowieso a Plag,
a toal kuiah alli nou an der Jagdvergab
sall hot's na sogar nou d'Stimm verschlaga,
i mecht enk da lei öpas saga,
tiats da Junga it so a Beispiel göba
es geit viel Wichtigeres nou im Löba

Trari, trara die flotte Berta isch da,
zum Gemeindearbeiterausflug geahs heind au,
miar fröda ins schua alla drau,
fahra tia miar auf Nauders auf a Novelleshof aucha,
tiat's nou fescht frühstücka , dass miar ja it viel braucha,
wissats bei enk miaßa miar spara,
nocha kenna miar huira mit'm Gemienderat a gonza Wocha fahra,
was hobats gmuant dös isch it wohr,
so geschehen im 2009 Johr.

Der Golfplatz isch nou it gstoarba der tia nou löba,
aber liaba Baura da Grund miaßat's da Bohna göba,
die salla tia die goldana Leabala bacha,
da habats für enk'r Löbti ausgoargat nacha.

Nou öppas steahrt mi, dös sag I Enk glei,
dös isch bei ins da dia Preisschleidereie,
zur Hauptferienzeit da Gösch in Sack icha steiga und numma außagiah
und im Prospekt dinna nou Familienfreundlich stiah,
sobald die Singl's und Doppelverdianer kehma,
dia wo's vermöga tata, lei mia d'Hälfte nehma,
wia oft hat ma dös Thema schua durchkuit,
ma kann woll an die Vernunft appelliera nutza tuats nuit,
nocha miaßat's hald wieter mocha a so,
und verkoufat's Enkra schiana Häuser unterm Niveau,
wenn unterm Strich lei mia Arbat steahrt,
nacha tat I glouba louft öpas verkeahrt,
tiats hold im Nochbar ou öppas vergwunna,
nocha scheint für ins all am Plateau da d'Sunna

Iatz mecht I nou gera wissa va Enk Verantwortliche Leit,
wia isch denn dös mit deana Baubescheid?
Brauch I den it voar I a Projekt fang an,
oder galtat dös lei für a kluana Mann?
An dia Gesetze weard sich wohl jeder holta miaßa,
sinsch tuat dös da normala Bürger verdriaßa.

Dös viele Salz auf insara Straß tuat dena Teppichböda it schmöcka,
am Langats miaßa´s sa wieder soviel Wasser löcka,
da muaß ma amal da Straßamuaster fraga,
dös tia dia Auto vr Hauptstraß ins Doarf ichatraga,
aber aper söts it sei und eisi ersch recht it woasch dös sei Sacha,
dia konn ma sowieso niamand richti mocha.

Dass die Gemeinde ou öpas zum klaga hei,
dös isch bei ins da dia Schnearaumarei,
kaum hoba die Gemeindearbeiter alls außagschoba,
blindrat jeder sein Schnea wieder icha auf Gemeindeboda,
es hat decht foscht jeder an Garta beim Haus,
nocha tiats´n dött icha wia schaut denn dös aus,
seit´s bittschia friedli und it a so z´wieder,
sinsch steiga lei die Gemeindestuira wieder.

Dia Häuser im Doarf weara alli greaßer und schiander,
dr Bluamaschmuck dr´für wieder kliander,
isch dr gemeinsame Ausflug kua Zugpferd miah?
Drweil isch´as alli sou gmiatli und schiah,
da muaß I am TVB und dr Gemeinde amal a hearzli´s Vergalts Gott sogä,
it alli lei kritisiera, schimpfa und kloga,
ou dia viara aufm Gemeindeamt douba,
muaß I wega ihrer Freundlichkeit und Hilfsbereitschaft gonz föscht loubä,
aber um nou uamal zu dena Bluama zugg z´keahma
sogar die Schitza lassa sich dös it neahma,
bei dem kluana Fensterla douba, schiana Bluama spriaßä,
dia sa hausli pflega und giaßä,
lei unterm Konzert sötta sa dös it mocha,
dös rinnt ja alli auf dia Musikanta ocha,
I mecht enk lei sogä dia brauchat´s it giaßä und dunga,
dös isch umasinscht dia wochsa decht numma.

Liaba Gemeinde I woasß es habat´s an haufa Pflichta,
aber a paar Faldweg wara ou wieder amal z´richta,
obwohl dia Junga fohra mit Ihra Moped liabar im Gras umanond,
ja ja s´Zuig vom Baur hot kuan Weart mia und dös isch a Schond.
Drweil kannta sa auf Obladis icha va uam Loch ins onder hupfa,
dös tat Enk a so richtig Crossmässig umanondar schupfa.

Parka wieder auf Gemeindegrund ungeniert,
iatz hat ma decht mit weißä Strich alls markiert,
dös wor it zum Spaß wia I Enk sog,
galta tuat dös für jeden und zwar ewig und drei Tog.

Fleißi sei sa schua in den Soalbohnrestaurant,
aber sie neahma longsam alls in d´Hond,
Veranstaltunga sei groaßa und schiana,
aber an Gschäftsmonn im Doarf kann nit mia verdiana,
dös sich I eigentli mit wohl am Grauß,
dös Doarflöba stirbt bei ins longsam aus,
dös lat miar Tag und Nacht kua Ruah,
uan Betrieb und Wiart nach´m ondara sperrt zua,
ou durch d´Untergossa isch numma so viel Rummel,
es fahlt hold uafach der Schaufensterbummel,

So mancha Ouga sieht ma strohla,
huira sei ja wieder Gemeinderatswohla,
wahrscheinli flottrat a zwoata Lista auf a Tisch,
denkat´s dron, dass dös heind numma uafach isch,
heind stellt jeder seinen Monn,
ma niamand mia d´Ouga auswischa kann,
die Junga haba sich vor Jahren schua beschweart,
dass ma sinsch s´gonz Johr it ongschaugt weart,
ober voar da Wohla da kenna d´Leit griaba,
da tia der Honi grad a so fliaßa,
und denkat´s on dös Woart va da Alta,
was ma verspricht sött ma ou halta,
und nou öpas mecht I Enk föscht ans Hearz leaga,
tiats für d´Wahlwerbung it an haufa Gald ausgöba,
tiats auf jeden Bürger schaua,
ös habat´s all inser Vertraua,

So iatz gloub I bin I rundumadum,
bedank mi beim gonza Publikum,
für Enkr Geduld und Aufmerksamkeit,
tiat´s föscht Essa und Trinkta liaba Leit,
und insar Obmann Christian hei,
a mords Fröd wenn ös alla 2014 seid´s wieder drbei,
dös Blochziacha isch an alta traditionella schiana Brauch,
aber wenn I in der Zeitung vo ma bsunders hoacha Festtag lös,
nocha krieg I a komisches Gefühl in meim Bauch,
dös hon I Enk nou saga wölla ,
und iatz tia miar dean Umzug untere Söga Gottes stella.